

NUNARSUAQ TAMAKKERLUGU ATUARNEQ 2021

ATUA RAKET



NUNARSUARMİ ANGALAVOQ

GLOBAL CAMPAIGN FOR
EDUCATION
www.campaignforeducation.org



OXFAM
IBIS



Oxfam IBIS nunat
tamalaat anguniagaata 4-p
naammassineqarnissaanik
qulakkeerinneqataavoq.
AtuaRaket atuarukku
tamatumunnga ukkase-
qataatitsissaatit.



ATUARFIK:

ILLOQARFIK:

ATUA RAKET

AtuaRaket 2021-mut tikilluaritsi / **4**

Udviklingsministerimit inuulluaqqussut / **6**

Nunarsuarmi AtuaRaket angalaqatigisiuk / **8**

NUKARLIIT

Rhoda neriuppoq sorsuuttoqarunnaassasoq / **10**

Banankaagi – *Mogens Lyhnem* / **20**

Joshua nassiussarsivoq / **32**

ILIKKAGAQRNERUGIT AKUULLUTILLU

Meeqqat AtuaRakettimiittut / **40**

Nunat anguniagaat ukkataralugit / **41**

Sapaatip akunnera sunniinarfiusoq / **42**

Katersuiniarneq / **44**

AKULLIIT

Jennifer wayuujuvoq / **46**

Anoraannguaq – *Cecilie Ekenim* / **54**

Muna iluameersumik angerlarsimaffittaarusuppoq / **64**

Qarmarsuaq aappalaartoq – *Lise Bidstrupim* / **72**

Djumansi Ardjomalua ilaqtutaminnut ikiuupput / **84**

Niviarsiaqqat ernumanarnerusarput: Nyirambere
naartuvoq / **92**

Niviarsiaq ileqqutoqqanik aporfeqanngitsoq / **94**

ATUARAKET 2021-MUT



“Eqqarsaatigilaariaruk atuartuususaanak...” Taama aallartippoq AtuaRaket siulleq ukiut 17-it matuma siorna saqqummersoq.

Illit nammineq 2020-mi atuartussaanaq misiginikuuat. Coronamik nappaalanersuup kikkut tamaasa sunnernikuuai. Nunarsuarmi tamarmi atuarmi matoorarput atuartullu angerlarartitaallutik. Atuartut amerlanerpaat angerlarsimaffimminni atuartinneqanngillat. Aamma sulii amerlasuut naluaat atuarfimmuut uteqqissinnaajumaarnerlutik.

Coronamik ajornartooqqanerup sulii pisuut piitsullu atukkamik nikinganer at anneruserseqqippaa. Meeqqallu – ingammik niarsiaqqat – piginnaatitaaffiiniq qulakkeeriniarneq ajornarnerulersillugu.

AtuaRakettimi matumani meeqqat atuakkat siuliniissimasut alakkassavagut. Ugandami corona peqqutugalugu matusinerup kingorna Joshuap atualeqqinngitsoornissani annilaangassutigaa. Djumansi Ardjoumalu Burkina Fasomi naapissavagut. Marluullutik atuarunnaarsimapput. Columbiani Jenniferikkut illoqarfeeraata aamarsuarnik paaavissuaq sanileraat. Muna Jordanimi qimaasunut ineqarfimmi inuunermi affaa sinnerlugu najugaqarsimavoq, Sydsudanimilu Rhoda eqqissineqarnissaanik sulii neriuteqarpoq. Meeqqat taakku tusareersimangikkukkit nittartakkatsinni oqaluttuarineqarnerat atuarsinnaavat.



Nunarsuarmi immikkuullarissumik angalaqatiginissat qilanaaraarput.

Atuaruarisi

Line Gørup Trolle, Hele Verden i Skole
(Nunarsuaq Tamakkerlugu Atuarneq)





UDVIKLINGSMINISTERIMIT INUULLUAQQUSSUT

Nunarsuaq Tamakkerlugu Atuarneq – tassa taamaattariaqaraluarpoq. Kikkut tamarmik pitsaasumik ilinniagaqarnissamik pisinnaatitaaffeqarput. Meeqqat tamarmik oqallinnermut sunniuteqaqataanissamullu peqataasinnaannut tunngavivuoq. Ilinniagaqarneq atukkatigut naligiinnginnerup annikillissarnisaanut aamma aqqutissaavoq.

Taamaattumik pingaaruteqarpoq atuartut meeqqat nunani ungasissumi inuunerannik atugarisaannillu ilinniarnissaat. Tamakku AtuaRaket atorlugu ilinniarsinnaavaat. Atuakami oqaluttuarineqartut kulturit allat paasinissaat ajornannginnerulersippaat aamma nammineq qanoq iliuseqaqataanissamut isumasarsiorfissaqqippoq.

Coruna peqqutigalugu matusisi-manerup kinguneranik meeqqat nunarsuarmi piitsuunerpaat qanoq eqqorneqarsimanersut atuarsinnaavasi. Meeqqat ilaasa atualeqqinnginnissartik annilaangatigaat. Niviarsiaaraanerusarput atuangitsut, taakku angerlarsimaffimmini ikiuuttariaqartarput qatanngutiminnillu paarsisarlutik. Soorunami

niviarsiaqqat nukappiaqqatulli periarfissaqartariaqarput.


Nunarsuarmi pissutsit paasisaqarfiginerulerussigit iliuseqaqataasinnaavusi. Immissinnut aamma meeqqat allat pillugit piumasaqateqarsinnaavusi. Sapaatip-akunnera sunniiniarfiusoq peqataaffineratigut nunarsuarmi anguniakkat sisamaat – atuarfiit pitsaasut – akuuffigisinnaavaarsi. Ukioq mannalukatersuiniarnermut meeqqat Sydsudanimi coruna peqqutigalugumatusinerup kingorna atualeqqinnisaannut ikiuteqaatasinnaallusi.

Ukiut 9-t qaangiuppata nunarsuarmi meeqqat tamarmik pitsaasumik atuareqassapput. Tassa 2030 nallertinnagu nunarsuarmioqatigiit anguniagaasa ilaat. Suliassaq annertoqaaq, atuarfiilli pitsaasut nunarsuarmi naligiinnerusumik atugaqarnissamut tunngaviliisuusapput – tamannalu tamatsinnut pitsaanerusumik kinguneqassaaq.

Rasmus Prehn
Udviklingsministeri



NUNARSUARMI ATUARAKET ANGALAQATIGISIUK



MUNA

Jordanimiippoq Muna. Syriamit qimaasunut ineqarfissuarmi najugaqarpoq. Neriutigaa takorluukkani piviusunngorniassammata pitsaasumik ilinniagaqarumarluni.



JENNIFER

Colombiamiippoq Jennifer. Naggueqatigiit wayuut ilagai, ilaquitariit aamaruutissarsiorfiup angisuup qanittuani najugaqarput.



DJUMANSI ARDJOURNALU

Burkina Fasomiipput Djumansi Ardjournalu. Ullut tamaasa ilaquttatik narsaatini ikiortarpaat.




RHODA

Sydsudanimi Rhodap ikinngutini baskettballeqatigisarpai nunarsuarmilu naalagaaffiit nutaannarsaannut siunissamik pitsaasumik kissaateqarluni.



JOSHUA

Joshua Ugandami najugaqarpoq atuarsinnaaniassagamilu aanamini najugaqarluni. Corunali peqqutaalluni aturfik siviisuumik matoqqavoq.



RHODA

Rhoda siullermik 9-nik ukioqartoq AtuaRaket 2017 Sydsudanimit tunngatitami tusarparput. Ilaqutariit nunaminnit sorsuuffiusumit qimaasimasut.

RHODA NERIUPPOQ SOR-SUUTTOQARUNNAASSASOQ

📖 LINE GØRUP TROLLE 📷 HEGILY HAKIM GEORGE & DOMINIC KANGO

Allami nunaqarnikuuvunga, misigisimavungali maani najugaqartuaannarsimallunga. Rhodamik ateqarpunga. 14-inik ukioqarpunga 5. klassimilu atuartuullunga.

Arfinilinnik ukioqarlunga illoqarfeeqqatsinnit Werniolimit qimaasariaqalerpugut. Qimaanerput sivisuvoq. Taamaatumik atuarfimmi – meeqqanut sivisuumik atuarsimanngitsunut klassilimmi – atuartuuvunga.

Ilaqutakkalu maanga Lologomut pigatta siullermik anganni najugaqarpugut. Angaga allamut nuummat illumik allamik attartorpugut.





Suli atuarfimmut qanittumi najugaqarpugut. Kisianni atuarfik matoqqavoq. Sydsudanimi corunartoqarpoq. Angerlarsimaffitsinni atuarneq ajorpugut. Tuluttut ilinniartitsisuma suliassannik pajunnikuuaanga. Suliarereernikuuara sulili tigoqqinngilaa.

Anaanaga suligaangat kisimiittarnera nuannarinngilara. Qimmerput Junub kingullermik siallertarnerata nalaani pulateriaarsummit kiitilluni toquvoq. Maqaaseqaara. Junubip illorput nakkutigisaraluarpaq uagullu paaraluta.

Ataataga suliniarluni nunaannarmut nuunnikuuvoq. Aniga angajugalu nuunnikuupput. Anaanaga qatanngutikkalu nukarliit najugaqatigaakka. Atuartarniassagama illoqarfimmi najugaqarpugut. Anaanaga ataatalu neriupput najugaqatigeeqqilerumaarlutik.



Errorsillunga erruillungalu anaanaga ikiortarpara. Anaanaga atuarfimmi nakkutilliisutut suliffeqaraluarpoq. Atuarfiup matoqqanerani tuniniaaffimmi sulisarpoq. Kisianni tassani naammattunik aningaasarsinissaq ajornakusooqaaq.

Neriuppunga atuarfik ammaqppat atuarnissannut akissaqassalluta. Atuarneq akeqanngilaq. Kisianni atuarfimmut akiliisarpugut krittinitu atuakkanullu. Aamma allattaaviit, aqerluusat uniformillu pisiarisussaavagut.



Siullermik allaffimmiunngornissara takorloortarnikuuara. Maannali nakorsanngorusulernikuuvunga allat ikiorsinnaaniassagakkit. Uanga nammineq isinnik ajornartorsiuteqarpunga. Isigisakka ersernerlupput – ingammik atuakkat allattarfissuarlu ajornartorsiutigisarpakka.

Ilinniartitsisora atuaqatikkalu maqaasivakka. Ikinngutigataera Rhoda nuunnikuuvuq. Allamik ikinngutiginerpaasagalerikuuvunga. Anyiethimik ateqarpoq. Sanilerigatsigu nereqatigiillattaasarpugut. Ullut tamangajaasa pinnguaqatigiittarpugut.

Kebe pississaarnerlu pinnguaatigisarpagut. Nuannarinerpaavarput basketball'erneq. Achui, Dengkon Nyapilu pinnguaqatigisarpagut. Aamma atuarfimmi ilinniartitsisup allattarfissuarmut allatai takusinnaangikkaangakkit ikiortarpaannga.




Asakulavugut aamma asaqaarluta pinnguaqatigeeqqusavugut. Aamma tungali pinnguaatigisarparput. Ujaraaqqat naluttarlugit akortarlugillu pinnguaat. Nalunaqimmat svisuumik sungiusarnikuuarput.





Sanilerput tv-qarpoq. Filmit Indiameersut isiginnaarniaraa-ngatsigit akuerisarpaatigut. Filmini taakkunani aqqusernit saligaatsuupput, illut portullutik meeqqallu tamarmik atuartuullutik. Neriuppunga ullut arlaanni Sydsudanimi pissutsit taamaaliumaartut.



Filmit assillu nittartakkami takusinnaavasi. Rhodap angerlarsimaffia alakkarsinnaavat, Sydsudan ilisimasaqarfigilissavat pinnguaallu tungali ilinniarlugu.

Qimaanitsinnit eqqaamasaqarpallaanngilanga. Eqqaamavara inuit arpattut anaanamalu sivisoorujussuarmik kakakkaanga. Kisianni sorsunneq oqallisigissallugu nuannarinngilara. Sydsudanimi eqqissisoqarnissaa kissaatigaara. Eqqissineq tassaattarpara ullut tamaasa atuariatorsinnaaneq. Aamma ersinani sumi tamaaniissinnaaneq.

Maanga tikeqqaaratta eqqarsartarpunga sorsuttoqarunnaarpat illoqarfeeqqannut angerlaqqissallunga. Maannakuunngitsoq. Werniolimi najugalinni aanaga kisiat ilisarimasaraara. Maanna manna Lologo angerlarsimaffigaara.

Coronartoqarunnaarpat angagalu aanaga tikeraarlugu Wernioliliassaagut. Qilanaareqaara.

SYDSUDAN ULLUMIKKUT: Sydsudanimi 2013-imili innuttaasut imminnut sorsuutilerput. Piffinni amerlasuuni meeqqat inuusuttullu toqqissillutik aneersinnaangillat. Pinerlunneq nakuusernerlu atugaaqaat. 2020-mi eqqissinissaq pillugu nutaamik isumaqati-giittoqarpoq. Augustimi nutaanik naalackersuisoqalermoq. Tamanna siunissamut neriuuteqalersitsivoq.





BANANKAAGI

MOGENS LYHNE  NETE SAHL

“Hajjaa!” Maja anersaaruluutigaluni oqarpoq
Anep kopiikkanik agguajutigaluni allattaavitik
tigoqqummagit. “3.a-kkuunaa,” Ane oqarpoq.
“Ullumi niviansiaraq Malalamik atilik tusassavarsi.
Taassuma kissaataasa annersarisimavaat atuarnermik
allannermillu ilikkarnissani.”

“Niaqqumigut ajoquteqarsimassaaq!” Maja
oqartoorpoq. Majap atuarneq allannerlu
nuannarinngilai. Qitittut mobilimilu spillit
nuannarisarai.

Meeraqatai illakulupput, Anep isikkorluppai.
Nipaarupput. Ane anersaaruluppoq.
“Maja, ilumoorputit, niaqqumigut ajoqusernikuuvoq,
atuarusukkami allakkusullunilu niaqqumigut
aallaatinnikuuvoq.”
“Qanoq aamma!” Maja oqarpoq.
“Namineq atuariatuk,” Ane akivoq.

Malala Pakistanimioq pillugu atuarput. Malalap atuarneq nuannarisorujussuusimavaa. Kisianni Pakistanimi anguteqarpoq isumaqartunik niviarsiaqqat atuartariaqanngitsut. 15-inik ukioqarluni niaqqumigut aallaatippoq. Toquliivissoq annaanneqarpoq. Maanna niviarsiaqqat tamarmik atuartsinnaanissaat suliniutigaa. Tusaamasaaqaaq. Nunarsuaq tamakkerlugu oqalugiartiginikuuaa arlalinnillu nersornaatisinikuulluni.

Atuaqatigiit namminneq atuarneq qanoq isumaqartiginerlugu allasapput. Maja suli allataqanngitsoq anitsiarput.

“Aqagu ataatsimiinnissarput eqqaamassavarsi,” Ane oqarpoq. “Maja, illit kaagimik nassartussaavutit.”
“Ijaa, anaanaga nunarsuarmi banankaagiliullaqqinnersaavoq.





Soraarangami ornittagaanut anaanaa sianersimavoq. Majagooq nammineq sikkilerluni angerlassaaq. Hajjaa! Sukkalisaaqaluni angerlarpoq. Anaanaa ajungikkaluarnarluni?

Anaanaa innangavoq.

“Hej Maja, niaqorloqaanga. Migrænerpunga. Pinnguaqatissarsiortariaqassaaitit.”

“Ajoqaaq, arlaannik ikiortariaqarpit?”

“Naagga, sinilaarsinnaaguma iluassaqaq.”

“Aqagumi kaagi nassatassara?”

“Aqagu kaagimik pisiniaannassaagut.

Massakkut aniilaaginnarit.”



Maja aneerusunngilaq. Kaagi kisiat
eqqarsaatigaa. Kaagi pisiaq?? Anersa!
Kisianni anaanaa ulloq naallugu
migrænertarpoq.
Aanaanami kaagimut najoqqutassaataa
nassaaraa.
Qupperneq ilivitsoq. Ila kakkaak!

YouTubemi video isiginnaarpaa.
Banankaagiliortoq. Kisianni oqaluttoq
sukkanermik. Aammami anaanaata
sanasartagaanit allaaneruvoq.

Majap najoqqutassiaq atuarpaa.
Nalunarpasippoq. Kisianni sapernaviannngilaa.
Marloriarlugu atuarpaa. Taava aallartippoq.
Uuttortaavoq. Bananit sequtserpai manniillu
akulerullugit.
Nalunaqaaq. Suliarivaali.

Iffiorfik ikippaa.
Kisimiitilluni ikeqqusaangikkaluarpaa.
Anaanani alakkarpaa. Sinippoq.
Kissarnera naammatsimmat ammarpaa.
Tigulloqquteqarpoq. Kisianni kaagi oqimaaqaaq.
"Na' aa ..." Maja nillerpoq.

"Sulerivit?"
Anaanaa anillassimavoq.
Maja qiavoq.
"Maja, sulerivit!"
"Illimmiuna kaagiliarisartakkat
nassarusunermik.
Soorluuna kusanassamaartoq."
"Nalunngilat kisimiitillutit iffiorfik ikeqqu-
saangikkit."
Maja anngaavoq.
"Ilittuunnginniassaaq nakkutigissavat.
Naamassippat aggeqqussavarma."
Iffiorfik passuteqqissanngilat!"
Maja anngaavoq.



Tamarmik Majap kaagiliaa mamareqaat.
Maja nuannaqaaq.
Taava allassimasartik atuassavaat.
Maja allataqanngilaq. Aqerluusani
tiguaa. Sukkasuumik allappoq.
Allassinnaavormi.
Naammassipallappaa.

"Atuffatilaarniartigut," Ane oqarpoq.
"Ilaana!"

Maja atuarpoq:

"Kaagiliorusuppunga. Anaanaga napparsimavoq.
Nammineq sanasariaqarakku atuaqqaartariaqarpunga.
Nalunaqaaq, ajornanngilarli. Atuarsinnaalluni
iluaqutaaqaaq.
Malala kakkaqaaq. Niviarsiaqqat kakkaqaat. Aamma
nukappiaqqat.
Kisianni angutit aallaannittartut sianeeqaat."



JOSHUA

Siullermik Joshua AtuaRaket
2020-mi Ugandamut tunngatitami
tusarparput 9-nik ukioqartoq.
Aanamini najugaqartoq
radiotaarusuttorujussuusorlu.

JOSHUA NASSIUSSARSIVOQ

📅 LINE GØRUP TROLLE 📷 EMMANUEL MUSERUKA

Joshua ikuttaavoq. Siallersarnerata naligimmagu issoq
aqippoq. Joshua ullut tamaasa narsaammiittarpoq. Aamma
najaa Sande nukaalu Shadrack. Shadrack aamma aanamini
najugaqalernikuuvoq.



Joshua p tusaavaa aanamik aggeqqugaatik.
Angerlapallattariaqarput. Susoqarsimasormitaavaana?



Joshuap nallarluni allagarsiani nammineq atuarusuppai.

Atuartut Danmarkimeersut nuannersunik allasimapput, eqqarsarpoq. Allaangilaq maanga Ugandamut tikeraaginna-raanga.

Joshuap nuannaraa nammineq allagarsiani atuarsinnaagamigit. Unnugu allakkat akillugit allanniarpoq.



Angut illup eqqaaniippoq. Karsimik tigummiarpoq. Karsi Joshuamukarpoq. Allakkanik titartakkanillu ulikkaarpoq.

Aamma atuagaq – LæseRaketten Ugandamut tunngasoq. Joshua Shadrack, Sande ikinngutaalu Joffrey atuarput. Assitik ilaasut takugaangamikkit illartarput.



Joshuap suliani nangeqqittariaqarpai. Qisuit kukutassani aasariaqarpai. Qisuit kukuppagit aanaa nerisassiussaaq. Joshua qulinik ukioqarpoq 5.klassimilu atuartuulluni. Qatanngutinilu atuarsinnaajumallutik aanaminni najugaqartariaqarput. Kisianni Ugandami coronartoqarmat atuarfik matoqqavoq.



Atuartut tamarmik allattaavinnik suliassar-talinnik pinikuupput. Joshuap tamaasa naammassereersimavai. Atuaqatini ilinniartitsisullu maqaasivai.

Maanna radiokkut atuartitsisoqartarpoq. Joshuali peqataa-sinnaangilaq. Innaallagiaqannngillat radioqaratillu.

Joshuap atualeqqinngit-soornissani annilaangagaa.





Joshuap anaanani eqqarsaatigaa. Ullut tamaasa maqaasisarpaa. Busserneq akisummat sivisuumik imminnut tikeraarsimangillat.

Joshuap nerereeruni Joffrey Oscarlu orninniarpai. Taakku ilagigaangamigit nuannaartarpoq. Aamma allamik ikinngutitaarnikuupput Akeramik atilik. Assatik asakullugit pinnguaqatigiinnissaminnut akuerisaasarput.

Akerap pinnguaammik lawicimik ilinniartinnikuuai. Aqqutissaq titartariarlugu ujaqqat simiillu naluttarlugit pinnguaat.

Joshua siunissami pilotinngorusuppoq. Taava nunarsuaq angallavigissavaa maqaasisanilu tikeraarlugit. Maannali kissaataasa annersaraat atualeqqinnissaq.

 
 Nittartakkami filmit assillu takusinnaavasi. Lawic pinnguaatiginissaa ilinniar-sinnaavarsi, Joshuap atuartunut allagai atuarsinnaavasi narsaammilu sulinera takullugu.



HELEVERDENISKOLE.DK/JOSHUA-2021





MEEQQAT ATUARAKETTIMIINNIKUT

Ukioq manna AtuaRakettip meeqqat nunani assigiinngitsuni tallimaneersut tikeraarpai. Nittartakkami meeqqat nunaallu pillugit allaatigisat sammisallu atuarsinnaavasi. Assit filmillu nutaat takusinnaavasi aamma assassugassat, pinnguariaatsit pinnguatillu ilininarsinnaavasi. Nunallu siusinnerusukkut sammineqarnikut pillugit paasissutissat, nunat oqaluttuassartaat, kulturiat, klimaat, atuarfii nassaarisinnaavasi.



NUNAT ANGUNIAGAAT

Nungusaataanngitsumik ineriartortit-sinermut FN-ip nunanut anguniagai 17-it ataatsimoorluta nunarsuatsinnut anguniagaraarput. Angunissaannut ukiut quliujunnaarpulluunniit. Taamaatumik iliuseqartariaqarpugut allangueqataallutalu.

AtuaRakettimi oqaluttuarineqartut tamarmik nunanut anguniakkat unaminartortaasa ilaannik imaqarput. Nunanut anguniakkanit arfinillit immik-kut samminiarlugit toqqarnikuuagut.

Atukkatigut naligiinnginneq, piitsuususeq aamma atuartuuneq, peqqinneq, naligiinneq aamma eqqissinissamik anguniagaqarneq pillugit atuarsinnaavasi.



HELEVERDENISKOLE.DK/TIL-ELEVEN



HELEVERDENISKOLE.DK/
VERDENSMAALENE



SAPAA TIP- AKUNNERA SUNNIINARFIUSOQ: PITSAASUNIK ATUARFEQALERN ISSAA ANGUNIARTIGU



Meeqqat tamarmik pitsaasumik ilinniagaqarnissamik pisinnaatitaaf-feqarput. Sulili nunarsuarmi meeqqat 59 millionit atuarfimmulluunniit isernikuunngillat. Tamanna iliuuseqarfigisariaqarpoq! 2030-nngornissaanut ukiut qulingiluannanngorput, nunarsuarmi siuttut neriorsuinikuupput meeqqat tamarmik taamaalippat atualersimassasut. Coronamik ajornartorsionerpaaffiup nalaani 2020-mi nunat amerlasuut matusimmata meeqqat quliugaangata qulingilu atuarneq ajorput. Meeqqat taakku sulil naluqaat qaqugu atualeqqissanerlutik atualeqqinngisaannasserlutilluunniit.

Taamaammat aatsaat taama pingaaruteqartigilerpoq nunarsuarmi siuttut neriorsuutiginikuusaannik eqqaasinnissaat, nunat anguniagaasa 4-nnik: meeqqat tamarmik pitsaasumik atuarfissaqassasut.

Politikerit nappaaffigikkitt

Atuartut nalunngilaat qanoq iliorunik iluamik tusaaniarneqas-sallutik: Nappaasarput. Oqariartuut tusaaneqarniassamat amerlaqalusi nappaasinnaavusi. Assaat angisuut pappiaqqamut qerataasumut qiortassavasi. Nunarsuarmi meeqqanut tamanut atuarfik pitsaasoq qanoq ittuunersoq titartarsiuk allalluguluunniit assammullu nipitillugu.

Nittartakkami ilisserusiat, ilitsersuutit peqataaniaraannilu qanoq iliortoqarsinnaanersoq nassaarisinnaavasi.

Assaat uatsinnut nassiutissavasi. Taava katersoriarlugit Statsministerimut ingerlateqqissavagut. Assasi isummasilu meeqqanut atuarfissaqanngitsunut iluaqutaassapput.

NAPPAALLUSI TAKUTISSIUK NUNARSUARMI MEEQQAT TAMAASA ATUARTUUTIKKUSUKKISI!



[HELEVERDENISKOLE.DK/AKTIONSUGEN-2021](https://heleverdeniskole.dk/aktionsugen-2021)



ASSAAT OXFAM IBISIMUT NASSIUTISSAVASI KINGUSINNERPAAMIK
ULLOQ 9. APRIL 2021 – AAMMA SAP. AK. 16-IMI
PEQATAASINNAAVUSI.

KATERSUINIARNEQ:

SYDSUDANIMI MEEQQAT ATUA- LEQQINNISSAANNUT IKIUUNNEQ

Sydsudanimi corona peqputigalugu matusigallarneq qaangiuppat atuar-
tut toqqissillutik atualeqqinissaannut ikiuussinnaavusi. Sydsudanimi
meeqqat amerlasuut atuarfiit ammarpata atualeqqinngitsoorsinnaap-
put. Soorlu aamma tamanna Rhodamit tusaripput. Arnaata atuarfimmil
atortut, qanermut assiaqutit assannullu spritit akissaqartingilai.

Taamaattumik ukioq manna klassimut naammatut puut katersorne-
qassapput, puut imarissavaat atuakkat, aqerluusat, kridtit, qanermut
assiaqutit, spritit, qaqorsaaitit, pississaarutit arsallu.

Katersiniarneq pisariunngitsoq – titartakkanik tuniniaaneq

Kusanartunik titartaasinnaavusi – assers. meeqqat AtuaRaketimiittut,
tuniniarlugillu soorlu angajoqqaassinnut, sanilissinnut allanulluunniit.
Anillatsillugit titartaaffissaatigut atorsinnaavasi, taakku MobilPay-
ikkut qanoq akiliisoqarsinnaanersoq ilitsersuutitaqarput katersiniar-
nermik piuminarnersitsisumik.

Plakati kusanartoq anillatseriarlugu nivinngarsinnaa-
varsi. Tassuuna katersiniarnersi malinnaaffigisinnaa-
varsi anguniakkassinillu angusaqaraangassi nalu-
naaqutsertarlugu. 2.000 kr angugussiuk Sydsudanimi
atuaqatigiit isumannaatsumik atualeqqinissaannut
atortussanut naammassapput.

Titartakkat tamarmik iluaqutaassapput. Ukiueqa-
taanissarsi neriuutigaarput.

ATUAQATIGIIT QANOQ
KATERSISINNAANERSUT
NITTARTAKKAMI
PAASISAQARNERU-
SINNAAVUSI

400 KR.
ISUMANNAALLISAATIT:
QANERMUT ASSIAQUTIT,
SPRITIT, ALLARUTIT
QAQORSAATILLU

800 KR.
ATUAQATIGIINNUT: ATUAKKAT,
ALLATTAAVIIT, PIIAATTI,
AQER-LUUSALLU

300 KR.
TIMIGISSARNERMUT
NIPILERSORNERMULLU
ATORTUT: PISSISSAA-
RUTIT, ARSAT
NIPILERSUUTILLU

500 KR.
ILINNIARTITSISUMUT:
ALLATTARFISSUAQ, KRIDTIT
ATUAKKALLU

PAASISSUTISSAT
ANNERTUNERUSUT
KIISALU TITARTAFFISSAT,
PLAKATIT MÆRKILLU
ANILLATSITASSAT
UANIIPPUT:

HELEVERDENISKOLE.DK/
INDSAMLING



ATUA- QATIGIINNUT





JENNIFER

Siullermik Jennifer AtuaRaket
2019-imi Colombiamut tunngatitami
tusarparput 10-nik ukioqartoq.
Ilaqtariit pilaavissuup
qanittuani najugaqarput.

JENNIFER WAYUUJUVOQ

LINE GØRUP TROLLE GENESIS GUTIERREZ

Jennifer Warrancami najugaqartuaannarnikuuvoq. Aamma angajoqqaavi aanakkuilu. Tamanna naggueqatigiit waayuut kinguaariippassuarni najugarisimavaat. Jennifer 12-inik ukioqarpoq marlunnillu nukaqarluni.

Atuarfik matunikuuvoq

Najugaata eqqaani atuarfik 6. klassi tikillugu taamaallaat atuarfiuvoq. Ukioq manna Jennifer atuarfimi angisuumi atuartoqarnerujussuarmi atualerpoq. Ulloq siulleq 7. klassimi atualissagami pissangaqaaq. Meeqqat angajullit busseqatigalugit illoqarfimmut Papayaliarput.

Jenniferip atuarfittaani nuannarivaa. Meeraqatai pitsaaqaat nutaanillu ilikkagaqartarnini nuannareqaa. Kisianni qaammatit marluinnaat tassani atuarpoq. Coruna peqqutigalugu marts 2020-mi Colombiami atuarfiit tamarmik matupput.

Ullut ilaanni angerlarsimalluni iluartaqaaq. Taava Jenniferip nammeneq aalajangertarpaa qaqugukkut atuarfimi suliassani sularissanerlugit. Anaanaata atuarfimmut allattaaviit aasarpai. Ilinniartitsisut atuartut allattaavii angerlarsimaffiinut aasarpaat. Jenniferip atuarfiani spanskisut aamma wayuunaiki – naggueqatigiit wayuut oqaasii – atorlugit atuartitsisarput. Taamaakkaluartoq ilinniartitsisumik aperisassa qarani suliassat ilai nalunartarput. Jennifer internetteqanngilaq, mobileqarani computereqaraniluunniit. Anaanaata sapinngisani tamaat ikiorniarsarisarpaa. Ilaanni angaata mobilia atorsinnaasarpaat.

Colombiami aasaanerani atuannigfik decembarimiit januarimut pisarpoq. Ukiup affaa sinnerlugu Jenniferip atuaqatini takusimangilai. Jennifer 7. klassi tamangajaat atuarnikuunnginnami 8. klassimut pinngitsoorsinnaanini annilaangatigaa.

Kukkukuut, savaasat arsarnerlu

Jenniferip ikinngutitaani maqaasivai. Illoqarfiliaqqusaanngilaq. Aamma Warrancami ikinngutini pinnguaqatigeqqusaanngilai. Anaanaata ilaqutariit corunamik tunillatsinnissaat annilaangagaa. Taamaammat Jenniferip qatannguteqarnini nuannaarutigeqaa. Zuleinis Lizettelu 8-nik 5-inillu ukiullit aamma illooraavi illumi sanilianni najugaqarput. Ullut tamaasa pinnguaqatigiittarput.

Ullaat tamaasa Jenniferip kukkukuujutitik nerisittarpai. Taava anaanani nerisassiorloq erruisorlu ikiortarpaa. Ualiklut aanani aatanilu ornittarpai. Taakku savaasaataat jagüey'mukaattarpai – itersarujussuaq imilik. Tassani savaasat imertarput. Utimut apuukkaangat aanaata oqaluttuanik oqaluttuuttarparaa. Jenniferip alanngumi issialluni aanaami Warrancami meeraasimanini oqaluttuarigaa tusarnaassallugu nuannareqaa.

Jennifer alanngumut pilluni atuarfimmi suliaassani suliarivai. ilaqutariit mannisugassaqaarniassammata ullaakkut kukkukuut nerisittarpai.



Jenniferip aatakkuni ullut tamaasa ikiortarpai. Minutsit tallimat pisulluni ornittarpai.

Ilaanni unnukkut Jennifer, nukai illooraavilu arsariartarput. Ullup qiteqqunnerani kiappallaartarpoq, unnukkulli arfernup kingorna arsarsinnaanngortarput. Arsaaffik ungasissumiimmat amerlanertigut jagüey'imi pinnguartarput. Tassani inuit naapittarput. Tassani pinnguarsinnaapput imaluunniit alanngormi eqqissisimaarsinnaallutik. Kiappoq tamaanilu suialaartarnera Jenniferip iluarisarpaa.

Pujoralak qernertoq sumi tamaaniippoq

Colombiap annersaani imeq imerneqarsinnaavoq nerisassiornermullu atorneqarsinnaalluni. Kisianni Jenniferikkut illuata eqqaani imeq ima mingutsitaatigaaq taamaallaat uumasunit imerneqarsinnaalluni. Sapaatit akunneri tamaasa lastbili aamaruutissarsiorfimmiit takkuttarpoq. Jenniferikkut illuata eqqaaniittoq tanki imermik imerneqarsinnaasumik immertarpaa. Warranca aamaruutissarsiorfissuup qanittuaniippoq. Piiavik illoqarfeeqqamiit takuneqarsinnaavoq. Piiavik ammasuuvoq, aallaanngilaq nunami putorujussuaq. Jenniferip piiavik naamasinnaavaa. Ikuallassunnippoq. Ilaanni nerisassani aamma naamaneqarsinnaasarpoo.



Warrancami illut eqqaat tamarmik imermut imigassamut tankeqarput. Taanna nerisassioraangamik atortarpaat.

Piaavik alliaruinnarpoq Jenniferikkullu illuannut qanilliaruinnarluni. Ilaqutariit amerlasuut illoqarfeeqqamit nuuttariaqarsimapput. Piaavik coruna peqqutigalugu qaammatini marlunni matoqqasimavoq. Maannali sulileqqinnikuupput. Siallituaraangat piaavimmit pujoralak peqqutaalluni qernertumik siallertarpoq. Jenniferip inuunera tamaat taamaassimavoq. Suna tamarmi qernertumik pujoralaraqarpoq. Naasut, illut qaavi aqqusernillu. Paarnat naatitallu neriniraanni errorloruaqqaartariaqarput. Nuna naggueqatigiit wayuut ukiuni hunnorujorpassuarni najorsimasaat mingutsitsinerup aserorppaa.

Jenniferip inersimasut oqallittut tusaasarpai coruna peqqutaalluni matuseqqanerup nalaani illoqarfimmi inuuniarneq amerlasuunut ilungersunarsimasoq. Inuussutissammi imerlu mingoqanngitsaq amigaatigineqartareerput. Aamma inuit uumasuutitik tunisinnajunnaarpaat sullissisinnajunnaarlutillu. Inuit tamarmik angerlasimaannartussaapput. Jenniferip illoqarfik avatangiisillu ernumagai. Siunissartik qanoq ikkumaarnersaq ernumassutigisarpaa.

Naggueqatigiit wayuujuvugut

Ilaqutariinni wayuujusuni niviarsiaqqat arnallu immikkut inissisimaffeqarput. Ileqqut amerlasuut ingerlateqqittussaavaat. Arnat panitik ikaartiterinermik wayuullu allalersueriaasiat malillugu nissiaanermik ilinniartittarpaat. Jenniferip nammeneq chinchorro'sani ikaartitersimavaa. Tassa taanna siniffik nivinngagaq siniffigisartagaa. Angutit nukappiaqqallu nasaniq kusanartunik perlaasillutik sanasarpuk kamippaliortarlutillu. Aamma tamarmik wayuut qiteriasiat ilinniartarpaat.

Arnat imigassaq chicha sanasarpaat. Jenniferip arnaa ullut tamaasa majsit savaasallu immuat atorlugit chichaliortarpoq. Mamaa sakkortulaarsinnaavoq. Jenniferip arnaata paarnanik naatitanillu akusarpaa tunguarnilaarniassammat. Chicha wayuut pingaartitaraat. Pulaartut tamarmik chichallerfigitittarput, inussiarnisaarlutik pisarpaat. Jenniferip pulaartoqarneq, ullorlu naallugu anaanani, ajani illooqqanilu peqatigalugit nerisassioartarneq maqaasivai. Pulaartoqaraangat savaasat neqaat suaasalerlugit nerisarpaat. Aamma mamartumik nillertumillu chichatoqatigiit tarput.

Jenniferip aanaata wayuutut allaliornermik ilinniartikkaa. Aamma nissiaalluni nammattagaliornermik ilinniartinnikuaa.





Jenniferip arnaata majsit savaasallu immuat kissallugit chichaliassatut piareersarpai.

El encierro – Mattusaaqqaneq

Ukioq manna Jenniferimut immikkut pisoqarpoq tulluussimaaruti-geqisaanik. "Encierro"-nikuuvoq isumaqartoq mattusaaqqaneq. Wayuut ileqqutoqaraat. Niviarsiaraa aaqaaqaraangami illuaqqami mattusimasarpoq. Tassani arnatut inuusuttutut inuuneq ilinniassavaa. Arnaata aanaavatalu kisimik alakkarsinnaavaat. Aanaajusup aalajangertarpaa mattusimaneq qanoq sivisutigissanersoq. Ullualunniit qaammammik sivisussuseqarsinnaavoq. Piffissaq taanna Jenniferimut nuanneqaaq. Ileqqut malillugit nissiaavoq. Aamma piffissami tassani naggueqatigiit wayuut pillugit ilikkagaqarneruvoq aamma inersimasuunermut tunngasunik.

Jenniferip wayuujunini tulluussimaarutigaa. Ileqqut ingerla-teqqikkusuppai. "Encierro"-p nalaani kisimiinnermini sulit takorluuk-kami piviusunngortinnissai ilungersuutigerusunnerulerpaa. Aamaruutissarsiorfimiit mingutsitsinerup unitsinneqarnissaa sulissutigerusuppa. Taava naggueqatigiit wayuut nunaatitik inuussutigisinnaanngooqqissavaat imerlu imersinnaanngorlugu. Jennifer aamma nakorsanngorusuppoq Warrancamilu inuit ikiorlugit. Taamaamat neriuppoq atuarfik erniinaq ammaqqissasoq.

PIIAVIK CERREJÓN: Jenniferikkut illoqarfeeraata eqqaani Colombiap avannaani paaaviik Cerrejón ippoq. Nunarsuarmi aamaruutissarsiorfiit anginerpaat ilagaat. Paaaviik 700 km²-itut annertutigaaq – nuna Qeqertarsuurtut annertutigisoq. Paaaviik mingutsitsigami, nappaatinititsisarluu imissaaleqisitsillunilu inunnut eqqaani najugaqartunut ajornartorsiutaaqaaq.



Filmit assillu nittartakkamiittut takusinnaavasi. Jenniferikkut alakkarsinnaavasi. Aamma aanaata ikaartiterinermik ilinniartikkaa takusinnaavasi.

HELEVERDENISKOLE.DK/JENNIFER-2021





ANORAANNGUAQ

☰ CECILIE EKEN ☰ PETER HEYDENREICH

Taamaalluni Cecilie Ekenip 4. klassit aperinikuuai: Meeqqammita Ghanamiup suna kissaatigaa? Atuartut takorluussavaat nunarsuaq tamarmi anorlertoq anorillu meeqqat eqqarsaataat kissaataallu tusaasinnaagai. Suna anorip Ghanami tusaassagaluarpaa? Atuartut akissutaat aallaavigalugit nukappiaraq Godwin pillugu oqaluttuaq pinngorpoq.

Taamaattumik nukappiaqqamik Ghanamiumik oqaluttuaq "Anoraannguaq" qallunaaqqat isaat aallaavigalugit oqaluttualiaavoq. Aamma oqaluttuaq arfineq-pingasunik erinarsuutitaqarpoq. Taamaattumik taaneqartarpoq oqaluttuaq tusarnaagassiaq. Anoraannguaq – "Den blide vind" Dansk Sangimeersoq pillugu nittartakkami paasisaqarnerusinnaavusi.

Godwin nukappiaraavoq Ghanamiu. Ullut ilaanni seqinnerluni silagissorsuugaa atuarfimmi matematikkileruttortut saniliisa ilaat John arpaannaq iserpoq.

"Godwin, Godwin aggipallagit. Ajortorujussuarmik pisoqarami!"

John kakaoinik naatitsivimmi ajutoortoqarsimanerarlugu oqaluttuarpoq. Godwinip ataataa orpimmit nakkarluni niua napisimavoq. Godwinip tamanna tusaramiuk arpaannaq illoqarfeeqqaminnukarpoq. Uummatini kassuttorujussuaq kiinnamigullu kiagunnini kuuttoq orpippassuit alianaaqisut akornisigut arpappoq. Anoraannguup suialaarnerata assut iluaraa. Nukkani, najani anaananilu erningajalersoq eqqasaatigai. Kissaatigaluaqaa sutigut tamatigut ilaqtaminut iluaqutaasinnaassalluni.

Illoqarfeeqqamut tikiummat angutaa napparsimavimmut illoqarfimmiittumut ingerlanneqarnissaminut piareerluni lastbiileqqani nalavoq. Godwinip anaanaa naanik ulikkaarluni

sinaani nikorfavoq maalallunilu: "Ajoqaaq, ila ajoqaaq." Ataataata tuppallersarniarsarigaluarpaq.

"Ingiaqatigissavakkit?" Godwin aperaaq, ataataali ileqimisaartorpoq.

"Maaniiginnarit anaanallu ikiorlugu," ataataata qinnuigaa.

Ullup ilaa matukkut kasuttortoqarpoq. Sunaaffa Addai, illoqarfeeqqami pisuujunerpaq, kakaoissanik naatitsiverujussuarmik piginnittoq. Oqarpoq tusarsimallugu Godwinip angutaa ajutoorsimasoq.

"Kisianni puigussanngilarsi 200 cedinik akiitsoqarassi."

Godwinip anaanaata akivaa maanna aamma napparsimavimmut akiliisariaqalissagamik akilerniarneri ajornassaqisoq. Aperaarlu taarsernissai kakaoinik katersereernissamut kinguartissinnaanersoq.

"Naagga." Addai soqutigisaqanngilaq, aningaasaatini tigorussupai. Aammagooq taarsigassarsiteqqinnianngilai.

Kingusinnerusukkut tusarpaat ataartik suliaritissimasoq nialu qequlernerqarluni. Ajunngilarooq ullulli arlallit suli napparsimavimmiittariaqarluni. Tusarluarput, unnummali innareerlutik Godwinip tusaasinnaavaa anaanani nipikitsumik qiarpaluttoq.

Aqaguani Godwinip napparsimavik ungasikkaluaqisoq angunni pulaarpaa. Arnaa taama ungasitsigisumut pisussinnaanngilaq. Puussiap nassataata imarai fufu, yamsmos neqeeqallu aserortikkat. Inersuarmi allat innangaqatigalugit ataataa siniffimmi nalavoq. Godwin takugamiuk nuannaqaaq.

"Erninnguara qujanaq. Taama ungasitsigisumit aggeravit tulluusimaarutigeqaakkit."

Godwinip takusinnaavaa ataatani asingasoq ernumarpassittorlu.


Godwin napparsimavimmit angerlalerluni aqqusineq biilnik, lastbiilnik, sikkilnik inunnillu ulikkaartoq ingerlavigaa. Aqqusineq ikaarnialeruttoraq taxat sukkaqalutik nueriasaarput. Godwin aportiippoq. Sakkortunngitsumik aportiikkaluarpoq kisianni uppikkami niaqqumigut annerpoq. Taxanit ilaasut niullutik alakkapallappaat. Arnap kusanartunik atisallip kimmikkaallip ikiorlugu nikuisippaa.

"Ajunngilatit?"

"Niaqora annernarpoq ..." Godwin oqarpoq.

"Hajjaa, kilersimavutit!" arnaq nillerpoq. "Ikiorniassavatsigit hotelitsinnut ilaginiartigit."

Godwin eqisimaarlugu taxanut ikeqatigaa. Nukappiaraq peqatigigunagaa aamma taxaniippoq. Qanoq periamik tassa Godwin illoqarfimmi hotelit kusanarnersaata aneerasaartarfiani issialerpoq ermitsillunilu. Nukappiaraq oqaluttuarpoq Ibrahimimik ateqarluni illoqarfiillu pingaarnersaannit Accrami najugaqarluni.





“Ataataga niuernermet tunngasunik ataatsimiigiarluni maaniippoq. Anaanagalu ilaavugut kingorna angaga atsagalu avannaatungaani najugallit tikeraalaarniassagatsigit. Colamik perusuppit?”

Godwin anngaavoq atisaallu akisuut isigalugit. Arnaata taskia skuuilu annoraaminermik pitsaasumik kentemik sanaajupput. Godwin qujaqaaq atisani kusanarnerit atisimagamigit. Immaqa taava piitsuunini nunaannarminngaanneersuunilu paasinaviannngilaat.

“Sumi najugaqarpit?” Ibrahim aperaaq.

“Ungasinngitsumi,” Godwin akivoq. “Erniinnaq ingerlaqqittariaqassaanga.”

Ibrahim pakatserpasippoq.

“Maaniilaaqqaarsinnaavit? Ataatama ataatsimiinnerani uagut maani asuli utaqqiinnassaagut. Nalunnguarsinnaavugut. Naluutinnik atorsinnaavutit.”

Hotelip eqqaaniippoq naluttarfik assut kusanartooq nuannerunartorlu. Godwin nangaajallakkuarpoq.

“Okey,” oqarpoq naluusilerartortorlu ingiaqatigalugu.


Kufferterpassuit atisanik imallit takuai. Ibrahim ikinnerpaamik nutaanik sisamanik skooqarpoq. Aamma pinnerasaataasivik nerrivimmiippoq.

Godwin qeqqiinnarluni tupigusuleruttortoq Ibrahimip tinnersarpaa.

“Aajuku naluusissatit, qaa naluttarfimmut ikiartorta!”

Naluttarfimmut ikigamik nuanningaarmat aningaasat skuullu nutaat eqqaaqqinngilai. Ibrahimilu pinnguarlutik nuannisangaaramik piffissaq maluginngitsoorlugu taavaana ualivissimasoq.

Aatsaat Ibrahimip angutaa takkummat Godwinip angerlartariaqalerluni eqqaavaa. Atisani ateriarlugit Ibrahim angajoqqaavilu inuulluaqqoriarlugit arpaannaq aallarpoq. Qujanartumik nunaqqatimi naammattoorluni ilaatimmani kingusinaarpallaannngilaq. Anaanani sumiissimanerminik oqaluttuutinnngilaa.





Aqaguani Godwin illoqarfiliqqippoq ataatani napparsimavimmut pulaariartorlugu.

“Erniinnaq angerlarsinnaangussaanga,” angutaa oqarpoq.

“Kisiani niora taamaatsillugu suliniarneq ajornassaqaq. Kakaoinik katersiffissaq qanilliartorpoq.”

“Ikiorumaarpakkit,” Godwin oqarpoq, angutaali ileqimisaartuinnarpoq.

Angerlamut aqgutaani Ibrahimikkut hoteliat saneqquppa. Ibrahim isaariaaniittoq aalateriffigaa, Ibrahimip takugamiuk usserarluni aggeqquaa.

“Anaaganalu qisunnik qiperuisartog tusaamasag pulaartussaavarput, ilaarusuppit? Anaanama tamakku nuannareqigamigit, ilaassaguit nuannernerussagaluarpoq.”

“Imaatt’... ajunngilaq ... ilaasinnaavunga.”

Ibrahim nuannaqaq. Godwinilu aqguta tamaat oqalupput illartarlutillu. Qisunnik qiperuisartup sannavianut pigamik angummit qiilimmit eqqissimasunik isilimmit

tikilluaqquneqarput. Qisussunnippoq sannakusunnilluni, ilisiviit qiperukkanik ulikkaarput. Ibrahim arnaata qisuk taartog timmissatut qiperugaq pisiaraa.

“Anaana, ilaa timmiaruna sankofa? Ilisarnaatinut adinkranut katersannut tulluassaqaq.”

“Aap,” Ibrahimip arnaa qungujuppoq. “Sankofa – oqariartaatsimut *Puiugaqaraanni uterfigeqqinnissaa kukkunerunngisaannarpoq* – tusarnikuuisiuk?”

Ibrahim Godwinilu anngaapput. Godwinip takuaa Ibrahimip arnaa ullumikkut allamik pinnerasaersimasog: uummataasaq angisooq guultimik sanaaq – aamma taanna Sankofamut ilisarnaataasog taannatullu isumaqartinneqartog nalunngilaa.

Utimut ingerlanerminni Ibrahimip arnaata cafémur qaaquai. Ingerlassallutik nikuinnerminni Ibrahimip arnaata pinneraatini guulteq katappaa – ujamertaa ikkulluanngitsoorsimammat. Ibrahimip arnaatalu maluginngilaat. Godwinip oqaaseqarani pinneraat tiguaa kaasarfiminullu ikillugu. Ingerlanerminni pinneraat eqqarsaatigingaaamiuk Ibrahim illartarlunilu oqaluttoq paasisaqarpiarani tusarnaarppaa.



Hotelimut tikiukkamik oqarpoq:

“Puigoraluarpara ornitassaqarlunga. Tamanut qujanaq.”

Akineqarnissani utaqqinagu arpalluni aallarpoq, aatsaallu sapilerami unilluni. Illoqarfimmiit aqqusinnermut anillariaanut killippoq illullu alanngortaanut ingilluni. Qanoq iliussava? Ataataa anaanaalu qanoq oqassappat?

Godwin sivisuumik issiavoq. Sivitsoqisoq nikuippoq hotelillu tungaanut ingerlarusaalerluni. Angutip saaffiginnittarfimmiittup ilisarigamiuk Ibrahimikkut inaanukarnissaa akueraa. Sivisuumik matuata silataani kasuttussamaarluni nikorfavoq.

Kiisami kasuttormat Ibrahimip angutaata ammaappaa.

“Hej Godwin, iserniarit.”

Ibrahim pissinnaq aggerpoq.

“Hej!” nuannaaqaluni suaarpoq.

Godwin nakangalluni nikorfaqqaaraluararluni pinnersaat kaasarfimmittu tiguua isaallugulu.

“Sunaana?” Ibrahimip angutaa kamappaseqaluni oqarpoq. “Suminnaanniit pigakku?”

Godwinip qulliini kuunnangersaasut malugisinnaavai.

“Ikiuunniannaraluarlungaana ...”

“Qanoq ikiuunniarlutit?” Ibrahim angumminit saamarpasinnerulluni aperiaq.

Taava Godwinip pisimasut tamaasa oqaluttuarai: ataatani, napparsimavik aningaasallu Addaimut taartissatik.

Inersimasut imminnut nakkupput. Taava Ibrahimip arnaa oqarpoq:

“Taxarluta Godwinikkuliarniarta. Anaanaa isumaa-lussimassaqaq.”

Taarsilivissoq apuupput. Godwinip arnaa anillappoq tikiuttullu nakkullugit.

“Godwin, susoqarami? Sooruna taama angerlajaanngitsigivit?”

Ibrahimip angajoqqaavisa susoqarsimanera oqaluttuaraat.

Ibrahimip angutaata oqaluttuani naggaseraa oqarluni inuit taakkutut unneqqarissut ikiorusullugit. Addaimut taartissaannik



napparsimavimmullu akiliutissaannik atukkerniarpai. Kakao-ininngooq tunisaqaraangamik naafferartumik akilertar-sinnaavaat. Godwin nuannaajallangaarami erinarsuutigaluni pississaarpoq.

Ingerlateralamik Ibrahim anaanimut isussuppoq:

“Anaana, suli timmiaq sankofa taskinniippa?”

Ibrahimip arnaata timmiaq sankofa tiguua taannalu Ibrahimip Godwinimut isaappaa.

“Aana tunissutisiassat,” oqarpoq. Marluullutik illarput.





MUNA

Muna siullermik tusarparput AtuaRaket 2018 Jordanimut tunngatitami. 10-nik ukioqarpoq qimaasullu najugaqarfianni Za'atarimi najugaqarluni. Ilaqtariit takorloorpaat Syriamut angerlaqqikkumaarlutik.

MUNA ILUAMEERSUMIK ANGERLARSIMAFFIT-TAARUSUPPOQ

LINE GØRUP TROLLE **NESMA AINSOUR**

Muna kunaffehtukkaminik kiisivoq. Kinguleqqap iffiugartai amitsukujuut tungusunnialaarlutik assut mamarput. Immussuaq qeqqaniittoq qarnup iluani aattuinnaavoq. Munap Maria atsanilu qungujuffigai. Neriniartarfimmiipput. Ualeq tamaat illoqarfimmi pisiniarfinnik isiginnaarnikuupput. Muna nuannaarpoq toqqissisimallunilu.

Anaanaata aggeqquserpalunna sinnattuaqineranit piviusumut uterteqqippaa. Illugisaminni containerimi natermi aqqalussanilu Motasim issiapput. Munap ullut qulit kingulliit eqqarsaatigai. Illoqqani Maria pulaarsimavaa. Atsaa illooraalu illoqarfimmi Maframi inissiami nuannersumi najugaqarput. Qimaasut najugaqarfiata ungasinngisaani. Muna angerlaqqammerpoq. Pulaarnini nuanningaarmat soorluli nuannersumik sinnattorsimaannartoq.

Munap arnaa aggeqqullugu suaqippallappoq. Munap iggavimmut ornippaa. Immaqa ullumikkut ullup-qeqqanut kabseh imaluunniit dawali sanassavaat. Munap mamarinerpaasai.

Ilaqtariit nuussimapput

Muna 14-inik ukioqaleqqammivoq. 6-inik ukioqartoq Za'atarimut pipput. Qimaasunut najugaqarfik Jordanip sioraannangajaasortaasa ilaanni ippoq. Aqqusinerni pujoralaqaqisuni tupit containerillu inissisimapput. Munap atsaa aanaalu Syriamut angerlarsimapput. Allani angerlartoqarpiarsimangilaq. Munap arnaata najugaqarfissiap avataani najugaqarnissani akissaqartingilaa. Taamaamat Munakkut angamik eqqaanut nuussimapput.

Illu illukuannit anginerulaarpoq. Maanna ilaqutariit containerit pingasut atorpaat. Aamma igaffeqarlutillu anartarfeqalerput. Illup qaani seqernup qinngorneranik tigooraassuteqarmat innaallagiaqaannalernikuupput, taamaannera fjernsynerluni iluaqaaq. Aamma illu imermik kuuginnartoqalermat Muna imertartariaarunnikuuvoq.

Atuarfik nutaaq

Nuukkamik Muna atuarfimmi allami atualerpoq. 9. klassimi atuarpoq. Atuarfikuanit angineruvoq atuartoqarlunilu 6. – 12. klassinut. Ullaap-tungaa niarsiaraqat atuartarput nukappiaqqallu ualikkut. Atuaqatitaavi pitsaaqaat, kisianni Munap atuarfikumini illoqqani Arwa, ilinniartitsisuni nuannarinerpaasani ikinngutinilu maqaasivai. Muna atuafittaamini aallartisimatsiartog sulilu ikinngutitaanngitsoq corunamik nunarsuaq tamakkerlugu tunillaassuunneq aallartippoq.



Munap mobilimi spil'li nuannarinerpaasani PUBG qatanngutini Mohammad 5-inik Motasimilu 10-nik ukiulik ilagalugit spil'leraa.

2018-imi Muna atuartunit qallunaaqqanit allagarsivoq. Taakku suli nuannareqai. Aamma tunissutisiatik ilaqtanilu assitik isiginnaartarpaat.



Corunap nalaani atuartitsinermi mobili ataaseq

Corunap nunarsuaq tamakkerlugu tuniluunna Jordanimut anngummat nuna qimaasunullu najugaqarfik matupput. Atuarfiit matupput inuillu piffissani aalajangersimasuni taamaallaat anisinnaapput.

Piffissaq taanna Munap eqqaamaqaa. "Atuarfik matoqqavoq. Najugaqarfissiami pisuttuarneq inerteqqutaavoq. Pulaartoqarneq ajorpugut, qaqutiguinnaq pinnguariatlunga anisarpunga, aammami tunillat-sinnissara ilaqtutamalu tunillatsinnissaat annilaangagisarakku."

Muna angerlarsimaffimmini atuartarpoq. Qimaasut najugaqarfianni inuit ilaannai internettimut isersinnaapput, Munakkut anaanamik mobilia paarlakaallugu atuarfimmi suliassaminut atortarpaat. Ilinniartitsisuata ullormut suliassaat videoliarlugit nassuiartarpari. Taakku ilinniartitsisuata anaanaanut nassiuttarpari. Taava Munap suliassani allattaavimminut sulareriarlugit assileriarlugit ilinniartitsisuminut utertittarpari. Suliassat akunnerit marluk – pingasut missaani suliassaasarput. Piffissap sinnera susassaaleqikujussinnaasarpoq.

Corunaqanngikkallarmat Munap sanilertik ikinngutiginerpaasani Mariam pinnguaqatigisarpaa. Kisianni Mariam najugaqarfissiamit nuuppoq. Najugaqarfissiami pissutsit nalinginnaasunnguleruurtut suli pinnguartarfiit matoqqapput. Taamaammat Munap qatanngutini toqquuttaateqatigalugit pinnguaqatiginerusarpai. Anaanani pisiniarfeqarfimmut ilagalugu nuannarisarpaa. Akuerisaagaangamilu mobilimik PUBG spil'kertarpaa. Aamma nipilersuutinik tusarnaartarpoq timersortarlunilu. "Massakkut YouTubekkut Zumba ilinniarpara," Muna illarluni oqarpoq.

Jordan angerlarsimaffigilernikuuara

Munap ilaanni illortik Syriamittoq eqqaaniarsarisarpaa. Kisianni eqqaamasaqarfigivallaanngilaa. Ataatanu eqqaamavaa. Jordanimiilereerlutik ataataa ajunaarpoq. Maqaasisaqaa.

Siusinnerusukkut Syriamut angerlarnissani Munap kissaatigi-sarnikooqaa. Maannakuunngitsoq. "Ilumoorlunga oqassaguma

Containerit najukkamik akornanni naatsiiveeraqarput kusanartunik naasulimmik. Munap imertertarpai.



Munap nerisassiorneq nuannaraa, ingammik araberit kaffiannik kaffiliorneq. Sungiusarnikooqigamiuk pikkorissinikooqaaq.



Syria maqaasinngilara. Eqqaamasakka amerlanerit maani Jordanimi inuuninni pisimapput," Muna oqarpoq.

Muna neriuppoq taamaallutik qimaasunut najugaqarfimmit nuunnissaminnut akissaqalerumaarlutik: "Najugaqarfimmi suut tamaasa qatsuppakka. Kissaatigeqaara inuttut allatuulli 'nalinginnaasutut' torersumik angerlarsimaffeqalerumaarnissara. Inissiami illumiluunniit, nammineq ineeraqarlunga." Aamma Muna qanigisaminik ikinnguteqarusuppoq. "Mafraqimi najugaqarusussinnaavunga illoqqannut Mariamut qanittumi. Illoorarivara ikinngutigalugulu."




Qimaasunut najugaqarfik Za'atari Syriamut killeqarfiup qanittuani Jordanip avannaaniippoq. Najugaqarfimmi Syriamit qimaasut 77.000 miss. najugaqarput. Munap titartaaneq, qalipaaneq assassornerlu nuannarai. Illussatut takorluukkani pappilissat atorlugit sanasimavaa. Taama ittumik angerlarsimaffeqarusuppoq.

Muna siunissamat allanik takorluugaqalernikuuvoq. "Atuarfimmi nalinginnaasumi atuarusuppunga pitsaasumillu ilinniagaqarlunga. Politiinngorusuppunga," oqarpoq. "Suliffiuvoq pingaarutilik. Isumaqarpunga meeqqat naalliuuteqassanngitsut, uagut naalliussimanitsit. Uanga inuit isumannaatsumi inuunissaat sulissutigerusuppara," naggasiivoq.

JORDANIMI QIMAASUT: Syriamit qimaasut 1 millioningajaat Jordanimi najugaqarput. Amerlasuut qimaasunut najugaqarfimmi najugaqarput, amerlanerpaalli najugaqarfissiat avataanni inissiani ilaqttaminniluunniit najugaqarput. Ilaat angerlarfissaqanngillat ilaasalu ulorianartorsiornissartik ernumagaat. Suli Syriami piffinni amerlasuuni eqqissiviillortoqarpoq. Illut aqqusernillu sequminnikuupput. Aningaasarsiornikkut ajornartorsiortoqarpoq tamannalu coronap suli ajornerulersippaa.



 Assit filmillu nittartakkami takusigit. Munap angerlarsimaffia alakkarsiuk Jordanimilu qimaasut paasisaqarfigine-rullugit.

HELEVERDENISKOLE.DK/MUNA-2021





QARMARSUAQ AAPPALAARTOQ

📖 LISE BIDSTRUP 🎬 LARS HORNEMAN

“Dingi, nerisassanik aallersinnavit?”

Anaanaga ulissiap saaguliussat tunuaniit suaarpallappoq. Anersaaruluppunga. Iluatsitsillunga akunnerup affaa kisimiilaarninni pinnguarbunga. Qaqtigorujussuaq pinnguarnissannut piffissaqartarpunga. Eqqumaninni piffissaq tamaat pisassanut suliassanullu atortarpara, taamaariarlunga iluanaarlunga ilinniagassaqartarpunga.

“Okey,” nipituumik anersaaruluutigalunga oqarpunga, anaanamami tusaaniassavaa qanoq eqianartigisoq. Nipera soqutigingilaa, koorerlu ulissiap ammarnatigut isaallugu. Tigoriarlugu tuaviinnaq ingerlavunga. Lastbiilit uninnissaat naatsorsorluarlugu taakaniittariaqarpoq. Taava iluatsitsilluni saarlernut ilannguttoqarsinnaavoq koorerlu ulikkaarlugu pissarsilluni. Ukiunnut sanilliullunga mikivunga, taamaammat anaanama uanga aallertittarpaanga. Inuit akornisigut qaangeraallunga ingerlasinnaasarpunga. Sianiginngisaannik qaangerarlugit saarlernut ilannguttarpunga. Angajora nerisassanik aallerneq ajungajappoq. Nukittuujuvoq, angilluni nerinnallunitu. Qaangeraaleraangat suaartartarpaat. Allaammi ullut ilaanni siggummigut kilersimalluni angerlarpoq.



Allarpassuit aamma aallerlutik ingerlaarput, uangali ajornannginnersiorluni aqqutissat nalunngilakka. Kiagoqaanga, piffissarmi kingulleq atasuinnarmik kiaguppunga. Massakut nunatta allorniusaata nala kiazarfiup nalaaniippoq. Kiisa kiaannaavilluni ukiut qulinngulerpai. Eqqaamasaqarfigilaarpara mikigallarama nunatta allorniusaata nala issittumiikkallarmat. Eqqaamasinnaavara aput oqummerlugu qanoq innersoq aputikkullu ingerlalluni qeraarpalaartarnera. Eqqaamasinnaavara qiarujussuarsinnaasarneq. Kisianni pissutsit tamakku qangali pisimapput. Kiaqarfissuaq nunatta allorniusaata nalaani uninngajuarsinnarpoq. Nuna panertorujussuuvoq, orpippassuarpasuit toqunikuupput ikuallannikuullutilluunnit, tatsit kuuillu paqqersimapput, suna tamarmi panernersuaqarfiuvoq. Amera panerpoq. Siggukka panerput. Kiassuaq sussaangilaq. Ullut ilaanni atuarfimi ilinniaritsisup oqaluttuaraa qanga nunarsuup ilaani piffiit aalajangersimasut kiattartut issittarlutillu. Issi aalajangersimasumik Qalasersuarmi Sikuiuitsorlu Kujallermit ittarsimavoq, kiallu ækvatorimiit siaruaattarsimalluni. Taamaattoqarsimanera takorluuinnarlugu qungujuttarpunga. Ilami taamaattoqarsimanera eqqumeeqaaq. Eqqarsaatigiinnarlugumi nillertoq nuannarinerugaanni avannaanut nuuttoqaannarsinnaasoq - kiazarfiup tikissinnaangisaanut. Eqqumeeruttormat soorlulimi sallu.

“Nukappiaraq-aa aqqutissat isigalugu!”

Angutip ajammanga uppingajaavippunga. Akiugassara kinaanersoq nalilerniarlugu qummut qiviarpara, nujaasali umiisalu aappaluttut, isaasa tungujortut nillerpasissut ingammillu tuiisa seqinermit uussimasut nerinnaqisullu akiuunnissaagalua unitsippaat, utoqqatseriarlungalu ungavarterlugu arpallunga ingerlaqqippunga. Inuit eqiterullutik ussattut amerligaluttuinnarput. Amerlanerit meeraapput. Allat aamma paasisimavaat mikisut sukkasuullu aallertillugit akilersinnaanersoq. Siuinnguanni perpaluttoqartoq tusaavara. Nakkutilliisut arnaq inuusuttoq tigusarisimavaat. Arnaq nunasiaammit allameersuusimassaaq. Qaqtigooriarlutik iluatsitsillutik uagut najugaqarfitsinnut isersinnaasarpud nerisassanillu agguagarsiassatsinnit

tillillutik. Uagut nunasiaqatigiulluta taamaaliorneq ajorpugut, uagummi Moguliunertarput pigissaartorujussuuvoq, imannak paasillugu – allanit najugaqarfinit uagut agguagarsiassagut annertunerulaartarput.

Agguasarfimmut piniariartunga lastbiilit nuipput. Piffissaq eqquffaarippara! Naatsorsorneqarsinnaaneq ajorpoq lastbiilit sumorpiaq unissanersut, taamaalilluni naak saarlarsaagaluarluni tunuleriiaani tunorlerpaanut pisoqarsinnaasarpog. Lastbiilit arpaannaq malippakka. Koorip tununnut anaarlussaannera soqtiginngilara. Nukappiaqqap qernertunik siaangasunik nujallip naalleriaraluaaraanga niua pissippara siullinngoqqillungalu lastbiilit tunuanut pillunga. Iluanaarlunga tunuleriiaani utaqgisut pingajuattut inissippunga. Imminut pikkoriginermik tanngaqaanga. Pisarnertut tununni perpaluttoqartoq tusaasinnaavara, tunorliit saarlinggorniarsarisut nakkutilliisunit luftkanonit atorlugit unitsinniarneqarpalupput.



Aatsaat lastbiilit unikkaangata tunuleriiaani inissisimaffik aalajangerneqarsinnaalertarpoq.

“Arpalluaqaatit!”

Jonap high five’erpaanga. Marlunnik akunneqarluta tunuleriippugut, kiinaani taartumi kigutai qaqortut ersareqaat.

“Qujanaq illillu.”

Taamaalisorlu lastbiilit usisarfiata ulissiaa illikartinneqarpoq agguasussallu piareerput. Ataasiakkaarluta koorigut isaattarpagut. Lastbiilit iluani soqarnersoq takugaangakku nuaga kuuttarpoq. Nerisassarpasuit! Nerisassanik agguasartuuneq nunasiaqarfimmi suliffiit nuannernersarisimassavaat. Takorluulaariaruk naatitat, suaasat immuillu ulloq naallugu naamasinnaallugit. Tassa uanga paradiisitut takorloortagara: nerisassanik nunguutsinngisaannarneq.

“Ila 7 kg-iluunniit angugunangiilaat,” oqarpoq angut saarlerpaaq, saluttoq, anillangasunik isilik qaamasunillu tukattunik nujalik.

“Nunasiaqarfiit ilaanni centimik nappaalasoqalerami,” ikiuuttut ilaat oqarpoq. “Tunisassiornerat annikilligami. Nalunngilat pissutsit qanoq ittuusut.”

Angut tuattoq koorini tigumiarlugu tunuarterpoq. Naakka sukapput. Centimik nappaalaneq. Nukillaajummeqaanga. Qujanaqaarmi najugaqarfigisatsinnut anngussimanngimmat. Kingullermik centimik nappaalasoqarmat tunillanneqanngilagut. Nunasiaqarfiimmi akornanni attaveqatigiinnermut tunngasunik malittarisassalorsimapput tunngavissaqarluartunik. Nappaat tunillaassuutiasorujussuuvoq, Moguliunertat Peqatigiiffiat ilungersoqaluni ukiuni qulikkaani akiuussutissamik nassaarniartuarualuarpoq.

“Nappaalaneq sakkortoqaa?” agguagarsinissannut tullinnguukkama akineqarnissara neriuutigalugu aperivunga.

“Nunasiaqarfinni pingasuni nunguullutik nungupput,” ikiuuttoq oqarpoq koorinnullu suaasanik kuisilluni. “Nunguttut ilagivaat naatitanik naatitsisartut, taamaamat naatitat ikittuararsuupput.”

Naakka suli sukariaannarput. Jonah angerlamut ingiaqatiginiassagakku illuaamillunga kooriata

immerneqarnissaa utaqqivara. Ungasinngisatsinni ineqarpoq ikinngutiginerpaasarivaralu.

“Ataataga kamassaqaq,” oqarpoq koorimi imai takutiitigalugit.

Uanga pissarsiannit ikinnerupput, taakkumi aamma marluinnaapput uagullu sisamaalluta.

“Sapaatip-akunneranut naammanngillat,” Jonah nangippoq.

Tuikka kiviimiinnarpakka. “Tassami taamaakkami allatut ajornaqaq, susinnaanngilarput.”



“Qamaniittut nerisassanik amigaaateqalaangillat,” Jonah oqarpoq niaqquminillu tikkuussilluni. Qarmarsuaq aappalaartoq portusooq, mogulit najugaannik kaajallaasimasooq saneqqullugu ingerlavugut. “Allaammi ataatama tusarsimavaa nappaammut centimut nakorsaataateqartut...”

“Tamanna upperinngilara,” ingasagiivillugu oqarpunga. Mogulit paarivaatigut. Nakorsaatisaqqarpit qularinngilara nakorsarneqarnissarpit isumagissagaat.

Jonap qalluni qullarlugit nakkuppaanga.

“Ilumuullutit upperaajak mogulit ajunnginnerpaamik isumaqarlutik taama atuagaqartikkaatigut?” mitallerpalulluni aperaaq. “Taakkununga uagut sulisuinnaavugut. Qanoq innerput soqutiginnilluinnarpaat, sulisinnaagutta naammagaat.”

“Kisiannimi centimik toqquteqarutta sullissinnaanngilagut,” akipiloorpara.

Jonah illariapalaarpoq.

“Taanna amerlavallaalinnginnissatsinnut atortoriinnarpaat,” oqarpoq. “Soorlu taamani Pikititsinersuaq pimmat.”

Ileqimisaartorpunga. Jonap Pikititsinersuaq tiguarteqqaffigisorujussuuaa. Ukiut 37-t matuma siorna pisimavoq, sulit inunngoqqajannigitsugut. Anaanaga oqartarpoq taamani pissutsit allarujussuusut. Nunasiaqarfinni assigiinngitsuni sulisartut kattullutik mogulinit naqisimaneqarlutik. Pikititsinerup nalaani centimik nappaalasoaqalersimavoq toqorartorpassuusimallutillu, nunasiaqarfinni assigiinngitsuneersut akulerullutik katersuussimanerisa kingunerisaanik. Ajunaarnersuusooq anaanaga oqarpoq. Jonap sianiigerpasillunga quujanaatsumik qungujuppoq.

“Ila eqqarsariartaatsit inequnaannarporluunniit, isumaqarpit silarsuaq naapertuilluartumik ingerlasooq?” oqarpoq. “Silarsuarmi pissutsit naammaginangeqaat. Pisuut pinikkaluttuinnarpit, uagullu ...” Tuini kiviimivai. “Nammineq pisuulluta pissutsit atuktagut akueriartuaaginnarpagut.”

Malugisinnaavara ulussakka kissarullertut. Jonah taama oqalukkaangat kamannarisarpara. Kiamita nalummagu mogulit aningaasaataat nerisassaataallu pinngikkutsigit

napasinnaanngitsugut. Iluaatsumik malugisinnaavara arlaannik ulorianartumik pisoqariaannaasooq.

“Puilasuliamukaqataajumaarpit?” allamut saasarlunga aperivara. Jonah anngaavoq. “*Knipserinik* nassassaanga?”

Anngaavunga. Knipserit tassaapput plastikiaqqat pinnguarisartakkagut. Imertaraangatta knipsinik pinnguapallattarpugut.

Seqineq apparivissoq puilasuliap eqqaani naapippugut.

“Takuuk! Taanna nukappiaraq milalik equngasumillu kigutilik knipsimik aappaluttumik pinnaffigigakku,” Jonah oqarpoq tanngassimaarlunilu knipseq takutillugu.

Assut torragalugu tiguara. Aappaluttut akuttoqaat. Knipsilaariarluta imertariarluta angerlamut aallarpugut, najugaqarfippit unnlernerani nillernerulaalersimalluni atoruminarpoq. Jonah knipsinik sisamanik pinnaffiginikuugakku uumisaalaarpara.

“Takuuk!”

Uneriasaariarluni qarmarsuaq aappalaartoq tikkuarppaa. Qarmasuup kimmuut sammisortaanit aqqusineeqqamut ungasissumi nuisaqqalaartumi qarmap qaava aappalaartoq aserorneraqqartoq takuneqarsinnaavoq. Qarmap putusimanera tarrajunnerani ersippiannigilaq. Jonap isai uummaarissippit.

“Qaagit.”

Putup tungaanut aallareerpoq. Uummatiga kassuppoq. Nalunngilara alakkartariaqarnagu, kisianni assut takusaqarusulerpunga. Nipaarsarlunga tunuani malippara, takuneqarnissarpit annilaangagingaarakku anersaartorpiarsinnaanngilangaluunniit. Qularnanngilaq taakani nakkutilliisoqarsimassaaq. Qarmarsuaq aappalaartoq putuninngisaannarpoq. Ilami aamma nakkutigineqanngitsumik putoqarsinnaanngilaq.

Kisianni inoqanngilaq.

“Ila kakkaak!”

Jonap niaqquni pulatillugu marserpoq.

“Suna takusinnaaviuk?” issanngoqalunga aperaara.

Jonap nusuppaanga. Marlulluta putukkut alakkarsinnaavugut.

Ilami allaat putoqqussinnavarput.

Takusara tupinnangaarmat aatsaannarpunga.

Seqernup qinngornerisa qaammarnani kingullerni paradisi erserpoq. Qorsooqaq. Ivikkat, palmit orpigaaluillu qorsuupput. Naasut qalipaattillit. Talerpia tungaaniippoq kuuk, qarmarsuup killinganit aallaaveqarunartoq. Silaannaq tipigissoq naamavara. Isikkumi kusanarneratut tipigitsigaaq.

“Tassa taama pisuut najugaqarput,” Jonah oqarpoq qungujullunilu nakkullunga. Niumi illua qarmap ammarnanut putoqqutsippaa.

“Jonah! Naamik ...” isussuffigaara. Eqqara qinerpara, qularnanngilaq nakkutilliisunik takkuttoqaliivissoq. Taamaaliortoqaqqusaanngilarmi – inerteqqutaarujussuarpoq.

“Takulaaginnarniarpara,” Jonah oqarpoq nipaatiigullu tusaasinnaavara nangartarneqarsinnaajunnaareersoq.

Qanoq iliusissaaruppunga. Niora mogulit nunaannut isertippara. Nusoqqippara. Sigguukka kiivakka. Jonah aggeqqusilluni aalaterisoq isigaara. Ilummut itisuumik anersaartorpunga. Niora uterteqqiinnarpara. Timmiaq palmit qaanniit tingimmat tuparujussuarpunga. Qarmap illua tungaani nunami soqanngitsumi isumannaatsumiippunga.

“Jonah!” Suaarpara. Tarrajummalli isigisinnaajunnaarpara. Akinngilaq aamma utinngilaq. “Jonah!”

Uninngalaariarlunga kaajallakkama arpaannaq aallarpunga. Ersivunga paatsuungallungalu.

Aqaguani suliassakka naammassigakkit arpaannaq Jonakkunnukarpunga.

Pissangangaarama uummatiga kassuppoq, qarmarsuup aappalaartup illua tungaani misigisaasa tusarnissaannut qilanaartorujussuuvunga. Arpaannaq sangugama arnaq utoqqaq apungajalluinnarpara. Kamalluni naveerlunga nilliaffigaanga. Pissangangaarama utoqqatsernissannulluunniit piffissaqanngilanga.

Jonakkut najugaannut apuukkama qeqqiinnarpunga. Isaariaa aappaluttumik nipputtartulerneqarsimavoq.



“Centimik nappaat,” oqaluttup tungaanut qiviarama angut meeraaqgamik kissumiartooq saappara. “Marluullutik unnuaq toqugamik. Iivissanik assaasartut aagaat takuakka. Neriuppunga allanik tunillataqarsimassanngitsut.”

“Kisiannimi ...” paatsuungallunga oqarpunga. Isaariaq assersorsimasooq qiviaqqippara.

“Illiisuuguma qanillissanngikkaluarpara,” angut nangipooq. “Nappaatip bakteriai aamma plastikkimiissinnaapput.”

Tunuarterpunga paatsuungaqalungalu angerlamut ingerlarusaalerlunga. Ilami qanoq iliussaanga? Eqqarsaateqangaarama niaqora qaanngersaavoq, nilliarusukkaluarpungaluunniit. Akunnerni 24-ni kingullerni pisut eqqarsaatiginiarsarigaluarpakka. Nalunngisakkali malillugit suut tamarmik ataqatigiinngillat. Jonah ippassaq centimik napparsimanngilaq. Ilami niaqquerilaanngilarluunniit. Malunniutaasinnaasumik sunnguamilluunniit ersittoqanngilaq. Arlaannik mogulit najugaqarfianni pisoqarsimassaaq. Susoqarsimassavami? Sooruna assaasartut aasimagaat? Immaqa arlaannik isertuussamik toqqorteriniarlutik? Imaluunniit tassa ilumoortumik toqusimanerpa? Merianngulerpunga. Qanorluunniillu pisoqarsimagaluarpat qamuuna ilorpiakkut malugisinnaavara ikinngutiginerpaasara annaasimallugu.

Takoqqinngisaannassagunarpara.





DJUMANSI ARDJOURNALU ILAQUTTAMINNU IKIUUPPUT

 LINE GØRUP TROLLE  CISSÉ AMADOU

Djumansip imeq baaliameerit qummuattamut kuivaa. Djumansi angajunilu Bavargou ullaat tamaasa imertartarput. Baaliat angisuut niaqquminniitillugit ingerlattarpaat. Imeq userartinnaveersaarlugu peqqissaarlutik majsinut narsaatit aqqusaarlugit angerlamut ingerlasarput. Ilaqutariit imeq ullormut nerisassionermut, erruinnermut uffarnermullu atugassaannik imertartarput.

Djumansi 17-inik ukioqarpoq angajoqqaani qatanngutinilu sisamat illoqatigai. Aqqalua nukarleq Ardjournamim ateqarpoq 12-inillu ukioqarluni. Taama ungasitsigisumut imertartariaarupput. Ilaqutariit ukioq manna illumut imertartarfimmu qaninnerusumut nuussimapput.

Lobitut ileqqutoqaqarnermit kristumiutut inuulerneq

Djumansi ilaqutaalu siullermik lobit illutoqaasa assinganni illoqarput. Ineerartaqaratik illuaraapput ammaluusattut marrarmik sanaat sisamaasut. Illutaavat lobit illuattut sanaajungilaq. Kipparissuuvoq qarmasissianillu sanaajulluni. Djumansip illutaartik iluarineruaa. Siullermik illuat sialloraangat kusertarpoq. Illutaavat taamaannginnami ukioq naallugu eqqissilluni sinittoqarsinnaavoq.

Djumansi Ardjournalu mikigallarmata ilaqutariit naggueqatigiit lobit ileqqi malippaat. Djumansip nalunngilaa illoqarfeeqqami ajorunnaarsitsisarput lobit aarnussatut atortagaat napparsimasut peqqissitinniarlugit atortaraat. Aamma Ardjournam lobit qiteriaasaasa ilaannik nalunngisaqarami tulluusimaarutigisaqaa. Marluullutik lobit nalliuttorsionerinit ilaasarnikuupput. Nalliuttuisa annersaraat djoro.

DJUMANSI ARDJOURNALU

Djumansi ilaqutaalu tusarfigeqqaarpagut AtuaRaket 2016 Burkina Fasomut tunngasumi. Djumansi 12-inik ukioqartoq ilinniartitsisunngorusuttorlu. Ardjouna 7-inik ukioqartoq illusaammillu periallaqqissuusoq.

Maannali ilaqutariit tamarmik kristumiunngorsimapput. Burkina Fasomi upperisamiit upperisamut allamut nuuttoqartarnera takornartaanngilaq. Djumansip Ardjoumallu namminneq toqqaasinnaanertik iluareqaat. Aamma sapaammi naalagiarternitik nuannaraat.

Ilaqutariit suli naasorissaasuupput

Djumansi imertareeraangami narsaatini suliassat aallartittarpai. Majsinut naatitsivik ikkussuineri, naasupiluijaanermi katersinermilu suliassartaqartaqaaq. Djumansip angutaa qangalaaq ajutoornikkut illuanik taleerussimavoq. Taamaamat sulerusukkaluaqaluni sulisinnaanera killeqartarmat ilaqutariit ikiuutingaatsiartariaqartarput.

Ilaqutariit ungasinngitsumut narsaatiminnut qanittumi illutaarput. Kisianni nuna nungunnikooqimmat naatitat inerittartut ukiut tamaasa ikiliartornerarlugit Djumansip angutaa oqaluttuarpoq. Qangatut siallissaarnikuuvoq nunalu assut panerluni. Ilaqutariit naammattunik inuussutissaqarniarnerat aamma majsinik savaasanillu tunisaqarniarnerat ajornarnerulernikuuvoq.



Djumansi Ardjoumalu angajoqqaik aamma Dimané Bourobarilu ilagalugit. Tunuanniipput narsaataat majsinik, hirsinik, durrenik bønnehillu naatitsivigisartagaat.



Djumansi qatannuginilu imertareeraangamik imeq qummuattarsuarmut kuisarpaat.

Nuna naggorluttoq aaqqiagiinnginnermik pilersitsivoq

Djumansi mikigallarmat Burkina Faso nunaavoq eqqissisimasooq. Nerisassat naammapput inuillu toqqissisimallutik. Djumansip angutaa oqaluttuarpoq nuna naggorluttoq nerisassallu amigartut peqqarniisernermik kinguneqarsimasut. Avannaani inoqajuitsoq siaruariartorpoq nunalu paneriartorluni. Piffiit ilaanni nunaqqatigiit kamaatilertarput. Piffinni allani naggueqatigiit assigiinngitsut nunalerngusaallutik akersuuttarput. Naggueqatigiit angalaannartut uumasuutitik ilagalugit nikittartut maanna malersugaasalernikuupput. Inuit aklerliissutigisarpaat nuna angalaannartut uumasuutaasa neriniarfiat kiap pigineraa.

Djumansi nujalerisunngorusuppoq

Djumansi 12-inik ukioqarluni ilinniartitsisunngorusunnikuuvoq. Taamani atuarfimmi pinngortitalerineq nuannarinersaavaa.

Djumansi
nujalerisutut
ilinniartuuvoq.
Naammagittarluni
sungiusartarpoq.
Perlaasineq
nuannarisoru-
jussuaa.



Kisianni 6. klassiusoq ilaqutariit atuarnissaanut akissaarummata atuarunnaartariaqarsimavoq. Naak Burkina Fasomi atuarneq akeqanngikkaluortoq ilaqutariit amerlasuut meeqqamik atuarnissaat akissaqartinngilaat. Atuakkat, allattaaviit aqerluusallu akeqarput, atuarfinnilu arlalinni atuartut uniformeartariaqarput.

Djumansip sulii Antoinette ikinngutigisorujussuaa, soorlu ukiut tallimat siorna taamaattut. Pisinnaagaangamik naapittarput. Djumansili nujalerisumut ilinniartuugami ulapittaqaq. Djumansip atsaata ilinniarfissamik ujaasinerani ikiorsimavaa. Awa ukiut tallimat nujalerisuusimasoq ilinniartuuffigaa.

Siallersarnerata nalaani narsaatini suliasat amerlasaqimmata ikiuuttarpoq, piffissap sinnera Djumansi ullut tamaasa Awami sulisarpoq. Ilinniartuunermi nalaani akissarsiaqarani sulisarpoq. Tassa ilinniartuulluni taamaappoq. Awamili akeqanngitsumik nereqataasarpoq. Tassa akissarsiaa. Awap Djumansi pikkorigeqaa sullerinnerarlugulu. Awap nujaleritittartullu Djumansi nuannareqaat. Nujaleritikkartortut amerlagaangata Djumansi killuisarpoq perlaasisarlunilu. Amitsukujuunngorlugit perlaasineq nuannarinersaavaa.

Djumansip Awamiinnini nuannareqaa. Pikkorisserusuppoq. Takorloortarpaa ullut arlaanni nammineq nujaleriffimmik ammaajumaarluni. Aamma inuusuttut allat nujalerisunngornissaannut ilinniartikkusuppai.

Ardjouma atualeqqikkusuppoq

Ilaqutariit meerartaat tamarmik atuarunnaarnikuupput. Nukarlarsaat Ardjouma kisimi immaqa atualeqqissinnaanermi periarfissaqarpoq - ilaqutariit akissaqalissappata. Tamanna neriuutigaat. Ardjouma 12-inik ukioqarpoq. 1.klassiulluni atuarunnaartariaqarsimavoq. Atuarneq nuannareqaa atualeqqikkusullunilu. Allaat misilitsinnerit nuannarisarpari. Massakkut ullut tamaasa narsaatini ikiuuttarpoq. Aamma savaasaatit savaatitillu paarisarpari.

Ardjouma sisamanik ikinngutigilluagaqarpoq. Arsartarput aamma illusaatit atorlugit piniartarput. Pissanganartaqaq, ingammik qamagaangamik. Arlaat pisaqaraangat Ardjouma nuannaarluni nilliasarpoq. Timmissat aapakaallu piniartarpari. Uumasut narsaatinukartaalisarpari majsit namminneq nerisassatik nerinnginniassamatigit.

Ardjoumap savaatit savaasaatitillu paarivai. Aamma nammineq narsaatini paarsaraa.





Ullaat tamaasa Ardjoumap
ataatani narsaatini
ikiortarpaa. Ilaanni
sanilimik narsaataanni
sulisaramik akissarsissu-
tigilaartarpaat.

Ardjoumap majsinik kaagiliat mamareqai. Aamma nammineq narsaateeraqarpoq. Tassani tomatit auberginillu naatittarpai. Mamaqaat ilaqutariillu nerisaanut tapertaalluarlutik.

Qatanngutigii tallimaasut nukarlersaat

Ardjouma narsaatini sulinngikkaangami ataataminut ikiuuttarpoq. Ardjouma angerlarsimasarpoq ataatani ikioqquppat ikiorsinnaaniassagamiuk. Ardjoumap nuannarinerpaasaasa ilagaat ataatami narsaatineeqatiginissaa – marluinnaallutik. Oqaaseqarpallaarneq ajoraluarlutik marluunertik iluarisaqaa. Ataatani sunik tamanik ikiorusuppa.

Ardjoumap aamma aatani ilagissallugu nuannarisarsimaqaa. Taannali qanittukkut toquvoq. Ardjouma aliasoqaaq. Aatanilu oqaloqatigiittarnit maqaaseqai. Aataa ukiorpasuarini inuuvoq, Ardjoumap sorpassuarunik ilinniarfiginikuuaa.

Ullut ilaanni Ardjoumap nukarlersaaneq qatsuttarppaa. Qatanngu-
taasa angajullit uumisaartarpaat suliassatillu Ardjoumamut
isumagisassanngorlugit qimaannartarlugit. Aammali nukar-
liuneq iluaqutitaqarpoq. Angajullit paarisarpaat. Ardjouma
mekanikerinngorusuppoq. Angajuata neriorsorsimavaa illoqarfimmi
qaninnermi Gaouami biliteriffimmik ilinniartuuffiginnaasaanik
ujarliutissallugu. Ardjouma neriuppoq iluatsitsiumaarluni.
Neriuutiginerpaasaali tassaavoq atualeqqinnissaminut
akissaqalissallutik.



Filmit assillu nittartakkamiittut
takusinnaavasi. Djumansi
qatanngutinilu imertartut aamma
Ardjoumakkut arstartut. Djumansi
nujaleriffimmittoq aamma
takuneqarsinnaavoq.

**HELEVERDENISKOLE.DK/
DJUMANSI-OG-ARDJOUA-2021**





NIVIARSIAQQAT ERNUMANARNERUSARPUT: NYIRAMBERE NAARTUVOQ

📖 LINE GØRUP TROLLE 📍 STELLA NASSOLO

Nyiramberep allagarpassuit titartakkallu nakkuppai. Nyiramberep meerarpassuarnit nassiussarsiani assut nuannaarutigai. Nyirambere isumaqarpoq meeqqat allassimasut assut allallaqqittut. Aamma LæseRakettenimi Ugandamut tunngatitami imminut takulluni alutoreqaa. Atuakkameeqataanini tulluussimaarutigeqaa ikinngutimilu atuakkanik tuninissai qilanaaralugu.

AtuaRaket 2020-mi Ugandamut tunngatitami Nyirambere kingullermik tusarneraniit inuunerani pisoqarsimaqaaq. Atuarfiit coruna peqqutigalugu matoqqanerisa nalaanni Nyirambere naartulersimavoq. Qaammatit tallimat qaangiuppata ernissaaq. Nyirambere 14-iinnarnik ukioqarami anaananngornissaminut sulii ukiukeqaaq.

Nyiramberep kina meerassaminut ataataanersoq angajoqqaaminut oqaluttuarisimavaa. Kisianni nammineq ilaqtannilu kisimik meeraq isumagisussaavaat. Nyiramberep naartulluni paasigamiuk assut aliasussimavoq. Naartutilluni atuaqqusaanngilaq. Ugandami pissutsit taamaapput. Qujanartumilli ilaqaataasa neriorsorsimavaat ernereerpat atualeqqinnissaanut ikiussallugu.

Nyirambere aamma suliniummut atatillugu ikiorneqassaaq. Siunner-sorneqartarpoq ernilerunilu nakorsanit ikiorneqassalluni. Ernereerluni atualeqqileruni immikkut tapersorsorneqassaaq, atuartut allat naartuneq, sulineq nappaalluunniit peqqutigalugu atuannngissimasut peqqatigalugit. Suli ilinniagaqarnissaminik takorluugaqarpoq.

Atuarfiit matugaangata nivarsiaqqat ernumanartorsiornerulertarput

Nyirambere iluatsitseqaaq atualeqqinnissani pilersaarutaareemat. FN-ip ernummatigaa coruna peqqutaalluni matusinerit qaangiuppata nunarsuarmi nivarsiaqqat 5 millionit atualeqqinngitsoornissaat.

NUNARSUARMI NUNAT PIITSUUNERSAANNI NIVIARSIAQQAT ERNUMANARNERPAAMI INISSISIMAPPUT PISSUTIGALU:

- Angerlarsimaffimmi ikiunnerusaramik qatanngutitillu paarisarlugit.
- Nivarsiaqqat atuannngikkaangamik meerartaajaarnissaat ilimanarnerusarmat.
- Nivarsiararpassuit aamma nukappiaqqat naartunaveersaatit nalummassuk (imaluunniit qanoq naartulertoqartarnersoq).
- Nivarsiaqqat qaammatini naartuffiminni ilikkagassaraluatik annaasarmatigit.
- Nunani amerlasuuni naartusut anaananngorlaalluunniit atuaqqusaaneq ajormata.
- inuusuttut anaananngorlaat amerlasuut atualeqqinneq ajormata meeqqatik atuarfimmuut nassarsinnaannginnamikkit.



NIVIARSIARAQ ILEQQUTOQ- QANIK APORFEQANNGITSOQ

 **BIGOA CHUOL - NUTSERISQ: LINE GØRUP TROLLE**
 **ABIGAIL MONTANA-SANTILLAN**

Oqaluttuaq una niviarsiaqqamut Awalimut Sydsudanimeersumut tunngasoq pisimasuiuvoq. Oqaluttuassartaa naatsukullaliani "Pigen der kæmpede for frihed – og andre historier om mod"-mi atuarneqarsinnaavoq. Taanna Oxfam i Sydsudanimit allanneqarpoq saqqummersinneqarlunilu. Oqaluttuarineqartut Sydsudanimi ilaatigut atuarfinni radiokkullu paasititsiniutitut atorneqartarput.

Meeraallunili Awalip timersorneq nuannarisorujussuuua. Assammik arsarneq, isikkamik arsarneq, volleyball – tamaasa pikkoriffigai. Sydsudanimi illoqarfimmi Rumbekimi peroriartorpoq.

Awal iluatsitsivoq, ilaquataasami timersornermik nuannarisaqarnerujussuanik tapersersorpaat. Anaanaa ulloq unnuarlu sulisarpoq. Awal qatanngutaalu atuarfimmi pitsaasumi atuarsinnaaniassammata tuniniaavimmi atisat tiillu tuniniartarpai. Awalip aniata basketballertalernissaanut isumassarsitippaa.

"Aanaanama nukittuunngornissannut ikiorpaanga. Suleruluppoq universitetimi Jubamiittumi atuarnissannut akissaqarniassagatta." Awal oqarpoq.

Awal niviarsiaqqani Rumbekimeersuni Sydsudanimi illoqarfimmi Waumi basketballimi pissartanngorniunnissamut toqqagaasut siullit ilagai. Kisianni ajugaanngitsoorput. Awal pakatseqaaq. Sulilu pitsaanerorusukkami sungiusartarnini annertusineruinnarpai.

Awalip takorluukkani – basketballimi sungiusaasunngornissaq - piviusunngortissallugu aalajangiuppaa. Rumbekimiut amerlasuut, ilami aamma ilaquataasa ilai, isumaqarput kukkusoq. Kamapput.

"Arnat basketballimi allanik sungiusaasusinnaanngillat," oqarput. "Arnat arnatut pissuseqartuaannartussaapput."

Awalili unitsitassaangilaq. "Piginnaanikka naammapput. Ilisimasariaqartut nalunngilakka aamma inuit tamarmik nalunngilaat basketballersinnaasunga!"

Qummut pisserujussuarsinnaavoq. Sukkasuumik arpattarpoq. Isertitsilluni pointinnattarpoq. Basketballillaqqittorujussuovoq. Sungiusaasuunissaminut piareersimavoq. Oqaatsit nikallornartut uniinnarfigingilai. "Arnaavunga aamma sungiusaasuusinnaavunga pikkorrisoq!" aalajangersimalluni oqarpoq.

Piffissap ingerlanerani sungiusartarnikuusai amerlaqaat. Pikkorissisaqaat basketballertartoqatigiinnilu tusaamasani arsartalartulit. Sydsudan sinnerlugu nunanut allanut unammiartortarput.

Oqitsuinnaangilarli. Allaat ilaanni Awal nammineq sungiusariarnissaminut akissaqarneq ajorpoq. Suli ullumikkut ulloqartarpoq atuarneq basketballernerlu tamaasa ataatsikkut piffissaqarfigineq ajornartittarlugit.

Taamaakkaluartoq Awalip suli sungiusaasutut pitsanngoriarnissani sulissutigaa. Suli pitsaanerorusuppoq. Takorloortarpaa taamaalluni USA-mukarumaarluni sungiusaasutullu sulilerluni. Taava suli ilikkagaqarnerusimalluni Sydsudanimit uterumaarpoq arstartartullu suli pitsaanerulersillugit.

Sulili Sydsudanimiikkallassaaq niviarsiaqqat arnallu timersornissaannut kajumissuseqalersitseqataaniarluni.



SYDSUDAN nunat naalagaaffinngorsimasut nutaanersaraat. Sivisuumik aaqqiagiinngiffiusimavoq innuttaasullu imminnut sorsuuffigisimavaat. Aamma nunaavoq niviarsiaqqat arnallu amerlasuut immikkut pineqarfigisartagaat. Angutit nukappiaqqallu angerlarsimaffimmi inuiaqatigiinnilu naalagaasarpud. Taamaammat nukappiaqqat niviarsiaqqallu assigiimmik periarfissaqanngillat. Qaqtikkut arnanik pisortanngortoqartarpoq, angutillu maligassatut nukittuutut saqqummiunneqartarlutik. Naatsukullaliani "Pigen der kæmpede for frihed – og andre historier om mod"-mi Oxfamip oqaluttuaraa maligassiusut piviusumik tunngaveqartut. Oqaluttuat nukappiaqqat niviarsiaqqallu imminnut upperinissaannik siunissamullu takorluukkamik malinnissaannik isumassarsiorfigisinnaavaat. Nittartakkatsinni annertunerusumik paasisaqarsinnaavusi.



Aana Awal Sydsudanimi angutunik basketballertartunik sungiusaasoq.

ATUARAKET 2021

Naqinnera siulleq

© Atuakkiortut, titartaasartut, assiliisut aamma Oxfam IBIS

ISBN: 978-87-585-1197-9

Immikkut qutsavigaagut atuakkiortut titartaasartullu akeqanngitsumik tunniussisimasut. Qutsavigaagullu qallunaa-toortaan Alexander Bach, Dorthe Nielsen aamma Inge-Lis Holst LæseRaketten 2021-mut kukkunersiunerannut.

AtuaRaket 2021-p imai Oxfam IBISip akisussaaffigai taamaallutilullu tunisisut aningaasaliisullu isumaannik ersersitsisuunatik.

Aaqqissuisoq

Line Gørup Trolle

Assit

Nesma Ainsour, Cissé Amadou, Hans Bach, Claus Bech, Hegily Hakim George, Genesis Gutierrez, Dominic Kango, Line Ellen Krabek, Emmanuel Museruka, Stella Nassolo aamma William Vest-Lilleøe. Saqqaani asseq: William Vest-Lillesøe, 2015

Ilusilersuisoq

Peter Waldorph / peterwaldorph.dk

Kalaallisuunngortitsisoq

Kathrine Knudsen Broberg

Kalaallisuuani kukkunersiortoq

Sófiârak Tobiassen

Naqiterneqarnera

Specialtrykkeriet Arco A/S

Siammarterisoq

Ilinniartitaanermut Aqutsisoqarfik

Kissarneqqortuunnguaq

Postboks 1016

3900 Nuuk

Oqarasuaat: 345000

www.ila.gl

Atuakkami titartaasut atuakkiortullu pillugit paasisaqarnerusinnaavusi uani heleverdeniskole.dk/tegnere-og-forfattere-2021

RHODA



MUNA



JOSHUA



JENNIFER



DJUMANSI & ARDJUMA



UKIOQ MANNA ATUARAKETIP ALLAASERINIKUUSANI ALAKKARPAI

Una atuagaq siuliinit allaaneruvoq. Meeqqat inuusuttullu siusinnerusukkut AtuaRaketimiinnikut tusarfigeqqissavagut. Nunat tallimat tikillugit nunarsuaq angallavingingaatsiassavarput. Meeqqat ullumikkut qanoq inuunertik oqaluttuarissavaat.

Afrikami meeqqat nunani pingasuniittut tusarfigissavagut. Ugandami coruna peqqutigalugu matusinerup kingorna Joshua neriuppoq atuarfik erninnaq ammaqquissasoq. Rhoda naalagaaffimmi innuttat imminnut sorsuunnerisa kingorna qimaasi-masoq Sydsudanimi najugaqarpoq. Djumansi aqqa-luaalu Ardjuma Burkina Fasomiittut atuarunnaar-simapput. Narsaatini ilaqquttaminnut ikiuuttarput.

Amerika Kujallermi Colombialiassaagut. Tassani aamaruutissanik pijaavik Jenniferikkut illuannut qanilligaluttuinnarpoq.

Kangia Qiterlermi Jordanip inoqajuitsuisa ilaanni Muna qimaasunut ineqarferujussuarmut pulaassavarput. Syriamut angerlarusukkunnaar-simavoq siunissamullu nutaanik takorluugaqaler-simalluni.

AtuaRaket aamma oqaluttuanik nutaanik qallunaat atuakkiortut allataannik imaqarpoq. Oqaluttuat nuannersuupput eqqarsarnartuullutillu.

AtuaRaketip aamma Nunarsuaq Tamakkerlugu Atuarnerup sammineratigut meeqqat tamarnik pitsaasumik atuarfeqarnissamik piginnaatitaaffeqarnerannik ukkase-gataatitsivutit.



**UDENRIGS
MINISTERIET**
Danida



ClimateCalc is a tool for calculating the carbon footprint of both the printing company and a specific print job.

CC-000094/DK



FSC
www.fsc.org

MIX
Papir fra
anevartlige kilder
FSC® C104808



OXFAM
IBIS